



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

ig tiryimym@aolima

yt tir yimym

TAPAK 8

Imran disqualify süra Khan Shah
Mahmood Qureshi-i PTI anitsü

HS Prannoy-i Malaysia
Masters kokogo



VOL. XX NO. 226 (ADOK 226) DIMAPUR TENTONÜ (MONDAY) MONUPII (MAY) 29 2023 ₹ 5.00

NSF office bendoktsüba JCB driver apu

Dimapur, May 28, 2023 (TYO): May 27 anepdang Naga Students Federation (NSF) office bendoktsüdag amshiba JCB driver puogo ta Nagaland Police ketdangsür kati ashi.

"JCB driver nem sen agüja mapa inyakdaksü. Pa dang inyaksü ashiba ama inyak saka pai metetsümonga inyakba masü" ta ketdangsürisa ashi.

Police-i CCTV footages reprangdang nisung 30 temai iba mapa inyakba angur aser temulung malemer nisung ishika dak tenük yoker. Police-i nisung pezü jangjaogo aser temulung meleme bilema ajak tekaratiba nung aputsü imlaba metetdaksüogo.

"Onoki akokba tashi bushisüngdang südar aser parnok aputsü imlar. Parnok ya atsüka alitsü akok" ta police ketdangsürisa ashi.

Tanü School Education & SCERT Advisor Dr Kekhrielhoulie Yhome-i iba tesem semdanga liasü.

"NSF ya yimtenren reju ka lir aser Naga Political movement ajanga tentetba telok ka lir. Iba mapa ajanga state nung dang masü saka North-east region ajunga aoksadaksüogo. Northeast nung kaketshir telok aika atema NSF ya tebudi ka ama lir" ta Advisor Yhome-i ashi.

Naga loktiliba nung tejashiba aser mepelaba sayutsü atema inyakyim balala lir saka iba mapa yabo talitabong inyakogo, ta paisa ashi.

Manipur nung nisung 2 asü; 12 yiru

Imphal, May 28, 2023 (Agencies): Deobarnü Manipur nung civilian dak injang khaloktsüdang aser telungpurtem o sepaitem tsüngda khatepdang nisung 2 khaset aser 12 yiru.

Imphal West district kübok Phayeng nung Kuki nunger telungpur ta temulung meleme bilemer kari injang khaloktsüdang nisung ka asü ta police ketdangsür kati ashi.

Army-i yimjung bener arutsü atema nübertem ket nungi prangpong-injangtem agientsüba mapa inyakdang lendong atalok.

"Kiojen nung mi senoktsür aser civilian dak injang khaloktsür telungpur 40 jungnüa sepaitemi khasetogo" ta Manipur Chief Minister N Biren Singh-i Deobarnü ashi.

"Tang adoka aliba rara ya kin o kin tsüngda masü saka telungpur aser security forces tsüngda lir. Telungpurtemi AK-47s, M-16 aser sniper rifles amshiba civilian dak injang khaloktsüba osangtem lir. Sepaitemi item telungpurtem dak tenük yoka mapa inyaker" ta Biren Singh-isa ashi.

"Iba mapa inyakba indang tangatetba aser tebilemba asenoki memetet saka anogo ana-aseam ka tsüngda shirnoki inyak'ar asenoki metettsü imlar. Ni tanü NSF den külemi tejashi lemsateper aser parnok pusemer" ta Yhome-isa metetdaksü.

NSF-i tangsa office amenoktsüla kechiyong nenoki maparen maneni inyaka aotstüla aser iba tatalokba atema tetsükdaksü maludaktsüsüla ta paisa ashi.

State sorkari senotsü teyari agütsüsü asü koda ta osangbenertemi asüngdangdang "onoki iba atema jembitsü. Ni NSF lennir kar den jembiogo aser parnok senotsü khuret ajurua lir anungji parnok dang nüngdakra onoki yariteptsü" ta Advisor Yhome-i langzü.

"Ni parnok aika meteta lir, ni NSF nungbo shilem kecha magi saka onok mapang shia külemi inyaksema aruogo. NSF ya dokan tilala nungi para angur aser dokan lapoka alirtemjia NSF den kibong ka ama dang arur. Anungji onoki parnok khuret atema yariteptsü" ta paisa shisem.

NSF-i tanü lungkak aittsü

"NSF-i Deobar nikongdang 6:00 ako tashi nung ki bendoktsürtem aputsü mapang züngzüksüba süiaka bushisüngdang maparen shitak meinyakba atema mepelaba sayua Hombarnep 9:00 ako nungi NSF office kima nung mener lungkak aittsü" ta NSF president Kegwayhun Tep-i metetdaksü.

Civilian tepsetba aser kiojen raksatsüba den rondoktsüba Kuki telungpurtem Jat regiment-i puogo, ta paisa ashi.

Deobarnep Imphal West kübok Uripok nung BJP MLA Khwairakpam Raghmani Singh'er ki raksatsü aser pa indang gari ana rondoktsü, ta security ketdangsür kati ashi.

Deobarnep tesem balala nung kin balala indang telungpurtem tsüngda aser ano telungpur o security forces tsüngda khatep, ta paisa ashi.

"Kakching kübok Sugnu, Churachandpur kübok Kangvi, Imphal West kübok Kangchup, Imphal East kübok Sagolmang, Bishenpur kübok Nungoipokpi, Imphal West kübok Khurkhul aser Kangpokpi kübok YKPI nung khatepba osangtem angazükogo" ta ketdangsürisa metetdaksü.

Sugnu nung khatepdang police ka khaset aser ka yiru. Sugnu nungsa tatalokba ka nung nisung 6 yiru aser Serou nungsa nisung 4 yiru.

Kakching nung telungpurtem den khatepdang police ka asüba osang angazüker.

PM Modi-i Parliament ki tasen lapoktsüogo



New Delhi, May 28, 2023 (Agencies): "India senso shiai Parliament House tasenba angudang kanga nüma atanger" ta Prime Minister Narendra Modi-i Deobarnü ashi.

Tanep PM Modi-i Parliament ki tasenba lapoktsüba sülen ki telung nung adenshia alirtem den jembidang iba olen ashi.

Deobarnü PM Modi-i Parliament ki tasenba semzüksü aser paisa Lok Sabha chamber nung Speaker menden anasa 'Sengol' enoka yutsü.

Parliament ki tasenba nung otsüsüsü 'Sengol' mayudang Adheenam nungeri iba ya tamasa puja süa meshiteta liasü.

"India ya democratic linük ka dang masü saka democracy tetsü lir. Iba ki tasen ajanga pei sasa litetba India temaba jenjangi atuba angutsü" ta Modi-isa ashi.

Tanü paisa Parliament ki tasen lapokba nungtem nung special commemorative postage stamp ka aser Rs 75 coin ka sayatsüogo.

Iba sentong nung Rajya Sabha Deputy Chairman

Harivansh-i President Droupadi Murmu aser Vice President Jagdeep Dhankhar nati züluba osang zünga metetdaksü.

Azüklen menden pezü amentepa atuba ki ya Rs 970 crore endoka yanglu. Iba ki ya Ahmedabad nung aliba HCP Design, Planning and Management ajanga design asü aser Tata Projects Limited ajanga yanglu.

Külen, Congress dena Opposition party 19-i Parliament ki tasenba lapokba sentong nung maden.

NSF-i ozüing alema atsünga agiba ki bendok: Naga Club

Dimapur, May 28, 2023 (Agencies): Naga Club lanurtemi Honibarnep Naga Club building bendoktsü mapa nungloktsü ta Deobarnü Naga Club-i iba mapa atema tenüing agiba metetdaksüogo.

Ki bendoktsürtem ya ozüing alema inyakertem masü saka chichiba ali aser ki kiburtem lir anungji parnok public kiojen raksatsü ta mesüra ozüing alema inyak ta asüba ken o kecha madoker. Naga Students' Federation (NSF)-i ang tashiyim agi aser ozüing alema Naga Club Building atsünga agia aru ta Naga Club-i ashi.

NSF-i benokba FIR nung tebilemba tamajung keta lir, kuli kecha mali aser tiyazü lir. Naga Club aser NSF tsüngda ken o ya civil issue ka lir aser Civil Court ka ajanga bentettsüla, ta Naga Club-isa metetdaksü.

Naga Club-isa North Police Station, Kohima nung Officer-In-Charge dangi shidi ka züluba nung iba tebilemstü indang otsü lemsatepba den okadak mesüra tapet sabang ka nung iba ken o angatetteptsü atema melatsü mepishia lir. Iba shidi nung president Kuolachalie Seyie aser secretary K Gwanilo Himb nati sign süa lir.

Naga Club ya 1918 küm tentet aser tanü ki aliba kimung ya Kohima Village-i Naga Club nem tenla agütsüba lir. Arrtsü telemsa kecha melii Naga nunger ajak longjemtsü tangatetba nung iba ki yanglu aser meta talang pilar

alidak nungi aruba Naga nunger angati anenzüksü atema yanglu, ta Naga Club-i shidi nung shia lir.

April 4, 1983 nü taoba NSF tiri Naga Club ya parnok office ama amshitsü mepishia asüngdang aser April 7, 1983 nü ita nung Rs 500 para agüja Naga Club Building nung alitsü mulungtepa liasü. Ajisüaka April 1983 nung mezüing ita atema para agütsüba dak alaka NSF-i Naga Club nem tang tashi nung para shitak agüja maru. Naga Club nung taoba General Secretary Vilavor Liegise aliba mapang NSF dang para meshi saka parnok senotsü mali ta shia Rs. 50 aser Rs. 100 dang agüja liasü ta shidi nung shia lir.

2017/18 nung Naga Club president inyaksü atema Krurovi Peseyie shimba sülen NSF-i Naga Club den ajuruteptsü memulung aser idangji parnok Naga Club den senden menra Naga Club agizüksüsa akümstü ta ashi. 2018 nung Naga Club tenteter küm 100 ajungba benjung amongdang NSF-i tai maketba kaketshirtem anidener Naga Club Building nung küm noklangzüng nungshilong yanglutsü noktanga liasü. Iba ajanga Jotsoma nung Zasibeito Nagi leper anasa November 29, 2018 nü Naga Club küm noklang ka ajungba nungshilong aziünga liasü, ta Naga Club-isa ashi.

November 2020 aser October 2021 nung Naga Club-i NSF dang Naga Club Building dak sendakba senden amentsü shidi

zülü saka sendeni NSF maru aser para-a magütsü. Iba jagi September 12, 2022 nü Naga Club-i NSF nem eviction notice ka agütsü, ta parnokisa metetdaksü.

NSF-i Naga Club building aser kimung commercial establishment ka akümbe aser Naga Club dang meshii para meshia agiba atema February 11, 2023 nü ali tenla agütsür Kohima Village Council-i NSF aitsü aser March 6, 2023 nü Naga Club-isa NSF nem vacation notice ka agüja liasü, ta Naga Club-i shidi nung shia lir.

May 19, 2023 nü Naga Club-i Deputy Commissioner Kohima dangi shidi ka zülü aser iba nung Old Secretariat Complex, Kohima anasa Naga Club kimung indang osang jangjatsü shia liasü. May 2023 tetenzüklen Naga Club Building nung alir kari azingtettsü aser item takdang tazüingtem bendoka liasü. Ajisüaka iba ki ya jila tiyongtsü nung aliba ajanga jana endoktsü asoshi heavy machinery/vehicle nungdaka aküm aser public nem timtem magütsüsü atema May 27, 2023 anepdang iba mapa inyaksü lemtet, ta Naga Club-isa metetdaksü.

Naga Club-i eviction notice agüjaka dokan aser office tem mazüingtetba atema Naga Club-i lanur kar nem ki bendoktsü aser kasa anogo nung public nem timtem magütsü jana endoktsü asoshi mapa inyaksü nungloktsü, ta Naga Club-isa ashi.

NSF office raksatsüba khukhua aitsür: GNF

Dimapur, Monupii/May 28 (TYO): Kohima jila tiyong nung aliba Naga Students' Federation (NSF) indang office raksatsüba osang angashia alima tesem balala nung aliba Naga nungger ola, Global Naga Forum (GNF) aoksar aser aitsür, ta GNF sangdong ka ajanga ashi.

May 27, 2023 anepdang züngia lia mejangjaba nisung temi tebilemba tamajung nung 1983 nungi NSF office amshia aruba ki raksatsüba ya Naga nungger pei sasa yimsü süa alitsü asoshi meranga nokdakba meji-menentsüba aser Naga nungger kaketshir dak tenük yokba mapa ka lir, ta ashi.

Naga civil society organization tem raksatsütsü merangba ngua temolung shiranger. Apex Naga civil society lokti tentet tem telemsa adokba nungi tenzüka tejangja masüba lokti tentet tem jenti aliba ajanga pan-Naga telungjem raksatsütsü merangba molungsentsü aser pei agitsü bilemba kuli angur, ta ashi.

Kin balala nungi Naga nungger kaketshir tenüung nung nokdakba NSF office raksatsüba ya Naga nungger ayak aser tejangraba nung mapa tamajung inyakba lir. Asen state yimtiba tiyong nung kanga mezüng-

mezünga ki raksatsütsüba ajanga mejangjaba nisung tem ya tepang agi meshitetba tashi tait lokti tentet teyari nung inyak amai sayur.

Naga lima telungjem aser ola samadaksütsü merangba nung takok mangutsü. Iba atema nisung meimchir-a süang lokti tentet-a süang, komarka tashi ulua liaka Naga nungger meyong temolungjang aser tanüla meraksatsütsütsü, ta nenshia ashir.

Kija aser lokti tentet densema Naga nungger ajak ola ka lir aser pei meyong temeden lir. Aser ibaji Naga nungger yimya nung temeshi aser asangsang amai wazüka ayur, ta GNF ajanga ashi.

Iba maksü mapa ya tasü ita bentetratetsüla aser ajaki aitsütsüla, aser iba mapa nung shilem agia aliba nisung mesüra telok memonui aputsüla. Iba ama mapa tamajung inyaktsü melena Naga nungger tebu-teti nungger iba mapa tamajung inyaker dang mangatetep kar danga lira itemji jembishinüa angateteptsü ajungshir, ta ashi.

Kohima tiyong nung aliba ali tajung rakzüksü mechi chichiba kibur Naga Club tenüung nung tasa tamajung asaa inyaksangshiba onoki aitsür. Yamaji kibur küma

jembiba ajanga tanü-asüng temzüng-ozüng aser Naga nungger sobaliba nung temeden mali.

Iba ki aser ali ya senmanger kibur (hereditary ownership) mali, anungji customary law mamshitet.

Global Naga Forum ajanga ketdangsürtem dang tekeraba nung mera agia obendang agütsütsü aser iba maksü aser mapa tamajung inyaker nem ozüng agi melaba ama merenshitsü ajungshir.

Naga lima nung yimjung, telungjem wazüka ayutsü ya ajak madak tongtipangtiba lir. Jembishinü aser jungshitepba ajanga dang asen arok tejangraba nung tayongzükbatem koktetsü.

Takar mesüra sensakser, tashi tait mesüra tashi mait, tashi ita aliba state nung dang nisung ajak ozüng matsüngdang kasasa lir, anungji iba mapa tamajung inyaktsü tasa atonger tekeraba nung pua temerenshi agütsütsü akhanger, ta GNF ajanga ashi.

Tensa mazüokteti t a m a j u n g b a mekumdaaksütsüsa tasü ita mera agitsü state mapa lir. Naga Students Federation aser Naga nungger ajanga den Global Naga Forum nokdaka lir, ta sangdong ajangasa ashi.

Naga nungger temeden bushiba tamendak dak raksatsü: NSCN/GPRN

Dimapur, Monupii/May 28 (TYO): Mejangjaba nisungtemi May 27, 2023 anepdang züngia lia Naga Students' Federation (NSF) office aliba Naga Club heritage ki raksatsüba ya asenoki apidangtsü makokba mapa tamajung ka lir, ta NSCN/GPRN sangdong ka ajanga ashi.

Ibai Nagalim tesem balala nung prokshia aliba Naga nungger kaketshir tentet tematiba, NSF kisüng mezüngmeshiba masü saka Naga freedom movement indang ayak ka lir. Naga Club

building nungya puti otsü aika lir aser asen temeden asoshi Naga political movement tenzükdak asen linük ayak ka lir, ta ashi.

Naga nungger shidak angateter ajunga molung anokshija iba ama mapa tamajung inyakba National Socialist Council of Nagalim (NSCN) ajanga aitsür. Mapa tamajung inyaker jangjatetsü asoshi ozüng amshir temi temolung agüja aser süoki ia inyaktsüla, ta NSCN/GPRN sangdong ajanga ashi.

Manipur lisopur kaketshirtemi media outlets mokdanger

Imphal, May 28, 2023 (Agencies): Manipur nung Kuki Students' Organisation (KSO) aser Hmar Students' Association (HSA) dena lisopur kaketshir teloktemi lendenlen aliba media outlets aitsüogo.

Lendenlen aliba media outlets-i Manipur nung lendong atalokba indang taila osang aser külen tsütsü dang shir osangtsüsang prokshir, ta parnokki aitsür.

"Lendenlen amenoka aliba media outlets aser talisa The

Sangai Express aser ISTV ajanga Media Ethics alema inyakba aitsür. Parnoki taila osang belenshir aser külen tsütsü dang shir osang zülur aser lisopurtem ola nembangtsür. Iba atema onoki lendenlen amenoka aliba media outlets ajak mokdanger" ta lisopur kaketshirtemi metetdaksü.

Parnokisa Assam nung regional news channel kati Manipur indang osang külen tsütsü dang shir sangdongba aitsüogo.

NSF Office raksatsüba khukhua aitsür: MSU

Dimapur, Monupii/May 28 (TYO): Kohima nung aliba Naga Students' Federation (NSF) indang Office HQ ozüngi memelai May 27, 2023 anepdang züngia lia raksatsüba osang angashia aoksar, ta Maram Students' Union (MSU) sangdong ka ajanga ashi.

Tanü asüng putu nung iba ama tasü mait mapa inyakba

MSU ajanga khukhua aitsür. Nisung ka aliba tesem mesüra ki raksatsüba ya Naga nungger sobaliba nung mapa tamajung lir. Asen Naga nungger kin tsüngta iba amala mapa ya kanga tia maka aser tanü tendak mapet lir, ta MSU ajanga ashi.

Mangatetep ajak asenoki jembishinüa lenmang bushia angateteptsüla.

Ketdangsüri iba timtem repranga aibelenertem tekeratiba nung pua tapet temerenshi agüjang, ta MSU-i ayongzük.

State aser arütsü alema oa aliba Naga nungger kaketshir asoshi NSF ya tentet tulutiba lir, anungji asen Naga nungger state tiyong nung iba ama tensa tia ajurutsü khenyongi tim masü, ta MSU ajangasa ashi.

ENPUM pur 50 buba kümshi agiba lokti senden aka



Mokokchung, 28th May (TYO): Eastern Nagaland People's Union, Mokokchung (ENPUM) pur 50 buba kümshi agiba lokti senden May 27 Honibarnü yangi Aongza Ki, Mokokchung nung kaogo. Iba senden nung ENPUM kübok aliba kin 6 tentet nungi arua shilem agia aden.

Iba senden nung Mokokchung SDO (Civil), Longdiba Sangtam-i jembidang, tejakleni aoba district

ka nung asen tsüraburtemi nükjidong tulu yur ENPUM tenzüka yutsüba asoshi mezüngpur nem tenüngsang agütsü.

Kijai telok bushir asü teloki kija bushir? ta asüba olen ka lemsatepdang, lokti-i kija asoshi kechi inyaktsür ta meimlai kija shiai lokti asoshi koba tashi shilem agir ta bilemetsüla, ta pai bilemdangtsü onük ka ashi.

Asenok ya Ao kin den külemi

alir, parnokji sobaliba, libaliru tajung aser sasa pela. Tawa UPSC tatidang nunga takok angur Naga nungger parnok 4 rongnung 3 bo Aor liasü, ta paisa Ao kin atishia aser tenüngsang agüja lemsatep. Paisa ENPUM purtem dang ilaa bilemba shisatsü intoker lokti renloktsü asoshi lenla ajak nung lirumedema inyaktsü asoshi ajungshia liasü.

ENPUM tenzüker yaküm 2022 nung küm 50 jungogo.

Assam Rifles temi mapa balala inyak

Dimapur, Monupii/May 28 (TYO): Assam Rifles temi Blood Bank Lions Club, Jorhat aser District Hospital, Mokokchung den lungjemer blood donation camp ka May 26, 2023 nü ayongzüka liasü.

Shirangertem, mashisa aliba tetsürtem aser ano ajungben rongdak mapang kanga bulua manguba blood group agütsütsü nükjidong nung iba sentong ya ayongzüka liasü.

Iba mapang nüburtemia molungsoa azü tenla agütsü aser Assam Rifles temi mapa tajung inyakba atema pelaba lemsatepa liasü.

Ano linük ajunga nung Swachha Bharat Abhiyan omen kübok lipajen wazüka aser müreka ayutsü nükjidong nung IGAR (N) kübok Assam Rifles temi Peren town nung May 26, 2023 nü mürekmejuba sentong

ka ayongzüka liasü. Assam Rifles temi iba sentong ya ayongzük aser yimdaklir aser lanurtem den külemi jila temeket müreka liasü.

Iba mapang ward chairman aser lanurtem dang sorkari 'universal sanitation coverage' atema meranga inyakba aser mürekmejuba nung ranglokba indang lemsatepa liasü.

Parnoki jana telung aser tzi ketdangsütsü yimyatem sayu aser temeket müreka ayuba ajanga tashidak ajemdaksüba, süngdong-lidong atemtsü ayongzüka liasü.

Assam Rifles temisa fossil fuels amshiba ajemtsü, carbon footprints ajemdaksütsü asoshi senzüsempingba yimya melenshitsü asoshia yimyatem sayua liasü.

Iba sentong nung nisung 21 arua aden.

Parliament ki tasenba semzükba nüngtem nung sen 75 jandi saya



May 28, 2023 nü New Delhi nung Ato kilonser Narendra Modi-i Parliament building tasenba semzüksüdang tangokba noksa nung angur. Kasa noksa nung Lok Sabha Speaker, Om Birla-a angur.

New Delhi, May 28 (Agencies): Amongnü New Delhi nung Parliament ki tasenba semzükba nüngtem nung sen 75 jandi sayaogo; iba dak alia linük nüchiso anguba sülen taküm küm 75 ajungba mong amonger.

Amongnü Ato kilonser, Narendra Modi-i Parliament ki tasenba semzüksüogo aser 1947 küm British nunger yimsütüba nungi India-i nüchiso anguba temaitsü Lok Sabha chamber nung 'Sengol' ayu.

Parliament building tejenba ya 1927 küm January 18 nü taoba mapang Governor-General, Lord Irwin-i semzükja liasü. Parliament building tasenba nung aliba Lok Sabha chamber nung züngsem 888 tashi mentettsü aser Rajya Sabha nung züngsem 300 tashi mentettsü.

Tamalen Finance Ministry-i, "Senpak 75 jandiji rule 'Coinage (Issue Of Commemorative Coin on the occasion of Inauguration of New Parliament Building)

Rules, 2023 kübok adoktsü," ta metetdakja liasü.

Senpak 75 jandi telonglong tasazükji 44 mm lir aser temeket nung tajentu 200 lir.

Jandiji shilem 50 silver,

ajichilen English oshi nung 'India' zülua lir.

Senpak 75 jandi nungjisa Rupee temaitsü keta lir aser Lion Capitol tsünglanglen 75 zülua lir.



shilem 40 copper, shilem 5 nickel aser shilem 5 zinc agi yanglu.

Jandi tejaklen tiyongtsü nung Lion Capitol of Ashika Pillar lir aser tsünglanglen Hindi oshi nung 'Satyamev Jayate' ta zülua lir, abelen tsütsü Devnagri oshi nung 'Bharat' zülua lir aser

Jandi tesülenji Parliament Complex noksa lir aser azüklen Devnagri oshi nung 'Sansad Snakul' zülua aliba den tsünglanglenji English oshi nung 'Parliament Complex' zülua lir.

Parliament Complex noksa tsünglanglenji 2023 zülua lir aser jandi ka touzükji gram 35 lir.

June 12 nü Patna nung opposition party lenirtem senden amentsü

New Delhi, May 28 (Agencies): June 12, 2023 nü Bihar yimtiba, Patna nung Bihar chief minister, Nitish Kumar leniba nung opposition party tem nungi lenirtem senden amentsü; 2024 küm Lok Sabha election nung opposition longjemer tokteptsü atema iba senden nungji jembitsü.

Tawa Karnataka assembly election nung Congress-i BJP madak takok tulu anguba ajanga opposition tera teimla ngur aliba

mapang ka nung taruba General election atema opposition party tem longjemtsü atema jembitsü.

Tawa Bihar Chief Minister Nitish Kumar-i Congress party Tir, Mallikarjun Kharge ajurua senden amenba sülen Congress-ia, kobi melii BJP nung madenba opposition party tem senden ayongzuka amentsü, ta metetdakja liasü.

Tesüiba ita ishika Bihar Chief Minister-i opposition party tem sabang ka nung longjemtsü

nükjidong nung party balala nungi lenirtem aika ajurua arudar.

May 22 nüa Kumar-i Congress Tir, Kharge aser Congress lenir Rahul Gandhi na ajurua liasü.

Kumar-isa regional party balala nungi lenirtem aika ajuruogo aser Delhi nung Aam Aadmi Party-i Centre sorkar indang Delhi ordinance benokba anema-a AAP pusema jembio.



May 28, 2023 nü Patna nung Union Public Service Commission (UPSC) Civil Services Prelims exam agütsüsupurtem examination centre kima tarensena nokdaka aliba noksa nung angur.

Parliament building nung India

ainba kuli asütsü: Jagdeep Dhankhar

New Delhi, Monupii/May 28 (Agencies): Amongnü linük tatong Tir aser Rajya Sabha chairperson, Jagdeep Dhankhar-i, Parliament building tasenba ajanga yimtenren tsütsü yaritsü aser iba ya alar tangatetba nungi nüchiso anguba temaitsü asütsü, ta ashi.

Parliament building taasenba semzükba sentong nung pai osang ka lemsatapa, "Parliament ki tasenba nung India nungertem taginüba

ataloktsütsü imlar," ta metetdaksü.

Parliament building tasenba nung Lok Sabha chamber nung agiba sentong nung pai lemsatetpa osangji Rajya Sabha Deputy Chairman, Harivanshi zünga metetdaksü.

Dhankhar-isa, Parliament building tasenba ya India renlokba kuli asütsü, ta ashi.

Amongnü Ato kilonser, Narendra Modi-i Parliament building tasenba semzüksüogo.



May 28, 2023 nü New Delhi nung AAP tongti aser Delhi Chief Minister, Arvind Kejriwal-i hospital-i oa AAP lenir aser taoba mapang Delhi Minister, Satyendar Jain ajurudang tangokba noksa nung angur.

Lok Sabha election sülen ang linük nung census agitsüa akok

New Delhi, May 28 (Agencies): India nung küm 10 shia Census (nütsüng züngdangba) agir, ajisüaka coronavirus wara ajanga census agitsü aliba mapang talangka atsülanga liasü aser maneni sangküm April-May ita nung Lok Sabha elections agiba sülen ang census agitettsüa akok, ta Amongnü ketdangsertem osang ka ajanga metetdaksü.

Census agidang nüburtem dang tasüngdangba 31 bosa asüngdangtsü, item rongnung smartphones, internet, laptops, computers, gari, two-wheelers aser tongti chiyungtsü kechi chiyunger, itemji densema asüngdangtsüa akok.

Registrar General & Census Commissioner office ajanga, census agidang sensotem dang asüngdangtsü atema tasüngdangba 31 renemogo, ta metetdaksü.

Tasüngdangbatem rongnung, ner kidang telephone line lir mali, internet connection ali asü, mobile mesüra smartphone, bicycle, scooter/motorcycle amshir asü, gari, jeep mesüra van amshir asü, ta asüngdangtsü densema lir.

Sensotem dangsa tzü tajemtsü kong nungi angur, metsümeshidak komala amshir, tzü tamajung kong indoker, joka nung LPG/PNG connection agia lir asü, radio, transistor aser television lir asü, ta asüngdangtsü.

Sensotem dangsa, kidang atem, jara aser kilemji kechi agi yanglu, kidang züngsem kwi alir, kibong nung tetsü tekolak asü, kibong nung tekolakji Scheduled Caste asü Scheduled Tribe nungi asü, kidang takdang kwi lir aser kibong nung kibong kümer alir kwi lir ta asüngdangtsü.

Election Commission aser

Registrar General & Census Commissioner office nungi ketdangsertemi, taküm October ita nungi Census agitsüji tasak asütsüa akok, ta metetdaksü.

2019 küm central sorkari 2021 küm Census agitsü sentong renema iba atemaji sen crore 8,754.23 lemezükja liasü aser nütsüng züngdangba maparen nisung million 3.3-i inyaktüsü bangjema liasü.

Census mezüngbuba shilemji 2020 küm April ita nungi September ita tashi aser tanabuba shilemji 2021 küm February ita nungi tenzüktsü sentong liasü, ajisüaka ajungbena coonavirus wara prokba ajanga census magitet aser taküm-a magitettsüa akok. Anungji 2024 küm Lok Sabha election agiba sülen ang census agitsüa akok, ta ketdangsertemi metetdaksü.

Küm ter shia linük nung census agiba ajanga data shidak bendena linük nung sensotem taziungba jenjang, shisaliok, tanur asoba, nisung asüba, oshi, tamangba yimsü, matamabensartem aser kibongtem den loktiliba osangtem jangjar.

Census ajangasa linük nung senostem arrshi küm, tetsü-tebur kwi ali aser kibong kwi alirar jangjar. Item osang ya yimtsüng, jila aser ward level nung bendener.

Census agidang teinyakertemi ki ajak sema form fill-up asür aser data ji Processing centres dangi yoker. Ajisüaka tangbo teinyakertemi tablets aser smartphones dang amshia kibok sema item osang bendentsü. Tamalenbo census agidang ita 12 tashi agia liasü saka tangbo iba dang nungjagi tekaraba renemtsüa akok.



TIR YIMYIM YIMOBILEM (EDITORIAL)

DIMAPUR TENTONÜ, MONUPII (MAY) 29, 2023

Mejung Mazüi Tenzükogo!

- Tangsen Lemtur

Shidakba agibo May 28, 2023 nü India nunger Parliament ki tasenba semzükba sentong ya alima dang linük telongjem sayuba anogomong ka südaktsütsüla, ajisüaka Parliament ki tasenba süzüka semzükba nung politics aitdaktsübayong kanga mejung mazüi tenzükogo, ta bilemer. Linük Tiri masü saka Ato kilonseri Parliament ki semzüktsütsü sentong aliba anema opposition party 19-i Parliament ki tasenba semzükba sentong nung madentsü sangdong; ajioda parnoki iba sentong nung maden. Sorkar tekolakji Tir Iir, linük nung mezüing sensoji Tir Iir aser Parliament nung tongtiji Tir, anungji Tiri dang Parliament ki tasenba semzüktsüla ta opposition party temi takhangba agüja liasü. Opposition-i ashibajia 'nunga' ta mashir, ajisüaka iba sentong nung khenyongi madentsü lemtetba yabo tera tali inyak asü ta bilemer. Shidi serbo 1975 küm Parliament building razüksema yangluba taoba mapang Ato kilonser, Indira Gandhi-i semzükja liasü aser taoba Ato kilonser Rajiv Gandhi-ia 1987 küm Parliament kaketnang yanglutsü atema foundation lung azüngja liasü, anungji tang Ato kilonser, Narendra Modi-i Parliament ki tasenba semzüktsüba nungji kecha tashishitsü mali ama bilemer. Yimtenren tsütsü sorkar aser opposition na tsüngda tajung nung anemtepbaji tim dang saka Parliament ki yabo arok meyong, anungji iba ama sentong ka nung yimtenren aitdaktsüba yabo tesasatsüka liasü. Sorkar tashi nung alirtem süaka opposition nung alirtem süaka ajakji nüburtemi shimtetba lenirtem lir aser inyakyim meshidakba atema ola adoktsüji opposition teinyaktsü shilem. Lenir ajakji nübur asoshi nüburtemi shimtetba lir, anungji sorkar aser opposition tsüngda tongtepratep aser amalitep-a alitsü nungdaker, saka tia maka sorkar aser opposition tsüngda tera tali anemteper aser tako chiteper! Atangji Parliament nung amenba mapang linük terenlok aser nüburtem jenjang ajungkettsütsü atema mapang agia o lemtepbaji dang nungibo kati ka aitsütepbaji mesüra tilutsütepbaji nung ang mapang teimba indoker. Alima nung democracy linük tulutibaji India lir aser alimai-a yamaji züngshir, saka alima dang tang ama noksa tamajung ya sayura alimai mezüngshitsüsa mapang ka arutsü. Yashi (May 28) ama kanga tongtibang sentong ka nung opposition party aikati madenba dak alia mapang talangka Jantar Mantar, New Delhi nung longkak aiter 'wrestler' temi longkak aita Parliament building tasenba tonga aotsü merangbaji ajanga Parliament Building tasenba kanga mejung mazüi tenzükba sayur. Joko tesüiba küm ishika sorkar aser opposition tsüngda Parliament senden nung rongrong adokba ajanga o lemtepbaji makai ozüng (bill) aika agizükogo aser tang amaisa süra tarutsü nunga o lemtepbaji makai bill aika agizüktsü. Parliament ya nüburtem ajak ajungtsü atema mapang peria agia asalentong tajung yanglutetba sabang ka lir, saka lenirtemi rongrong adokba sabang ka dang mesüka kümdaktsüogo. Tang Parliament ki tasenba ya tamarener ki ama yanglutetba semzükogo, saka iba kidang nüburtem atema sorkar aser opposition tsüngda mapang agia onük balala nung o melemteptetra mesüra shisa melemsateptetra ki tepor ajungbaji dang asütsü.

OLEMSABANG

AOR KILUNG OSET KAKET RÜSHIBA (BOOK REVIEW)

- T. Meren Paul, Lower PR Hill, Kohima

Ao Students' Conference-i (AKM) kanga rateta *Aor Kilung Oset* Kaket page 137 keter adokba ngua kanga pelaseta züngdang-a reprangogo. Joko yimdaklir-ah süng alu mayimerji etem kilung osetdem aika mamshirji menügdaker anungji tasenahmeyanglur aser tejen temjia raksaa endoka adoker. Yimdak yimtsüng nung joko Puccaki aser RCC ki asüerji etem osetdemya tayudak maka aser ki den mapeterji kidangah mayur aser menügdakerji endoka adoker. AKM-i mapang shidak nung apiteta iba kaket adokba ajanga tarutsü asodemi tenüngden noksa ajangaji Aor-i amshiba Kilung osetdemji eteme liasü ta metettsü. Joko nungja meteta bententetba aser oset ajak ya tejen makarabang tasen yanglua noksa tabensa kaket nungji enoktsüla aser kokra AKM Museum ka yanglua yangji rezüng nung jungla. Second edition adokdang metongshitsü aser enoksemtsü asoshi, Okila line 18 nung shisema aliba dak ajemdakerni ajetetba karh züluer yoker aser yimlar ibajagi kaket tabensaba akumtsü. Iba ama kaket kumteta asen Aor kilung oset nungja zülua doktsüba jagi etem tenüngtemji tarutsü putu lanurtem asoshi mesamadaktsüi rezünga doktsür. Ni memetetbatem ano alitsü, pushisema enoktsü merangstüla.

1. Tamasah Page IV, Tir Menden nungi, para 3, 'Asen oshi nung—-ta zülua lurmaneni page V nung —-agütsüba kaket ka asütsü imlar' ta tembanga lir. Saka ano maneni tanapuba para nungjia ano iba kasaparagraph ya tanaben zülua angur (repetition) Anungji paragraph ka aidoka endoktsüla (delete)
2. Ao Senden Literature Board Kaket adoktsü temelaba, para 1 line 6 nung "*Yimpoktsüi*" ta masü saka "*Yimpoktsüi*" ta, ASLB Arok Osep, Shilem Ana, Zonizüng Nungja Ratet page 303 nung agüja aliba ama spelling melenshitsüla.
3. Shilem 1, tetsür ka tsüksü apah alibaji mapatai eteme angur. (1) *Tsüksü ap* dang nisung anadi aper, kati chi/molok nungi tsükji athitsü aser kati per agi aptsü, saka tsük ap dang tetsür nübo menügdaker. Tetsüri tsük apaha sayudisüra tetsüng tepen aser tekum nung teptsü ayak sayutsüla aser aeir süra tola masü tekujen agitsüla aser chientsür sura tola masem azük Tongpang anuer alitsüla. Imsong Pongen aser Longkumtsür süra Yongmen anoer alitsüla.
4. Page 3, "*Jangbong*" denji kulemi *Jangbong Küptsü/Temekettsü* ka alitsüla. Jangbong kodangah lapoka mayur saka anakona aser shiruru, talisa koya maitsü temekettsü agi teti jungjunga küpbanga/nembanga ayur.
5. Page 6, "*Mosem*" den ano *Tsükrü Anung* ta ser Mosem dang tilaba, anü nung tsük pur tsük Taraji tsükasentsü asoshi ayuba ka lir. Ano Jendang tsük ayuba Mosem dang tuluba ka lir, iba dangji "*Anung*" ta ajar.
6. Page 11, "*Süngbenkhu*", English translation, line 2 '*sung*' ta alibaji '*süng*' agi melentsüla
7. Page 16, *Semkhu*, Rated: 1) Yangi *yi ajepsa-a senzüker* ta ratet agütsübaji tai, yi ya tzü ama (liquid form) anungji tzü koda ajepsatsü. Yangi *piya ajepsa-ah mejemtsü (yi) senzüker*.
8. Page 19, Sayua aliba makang ya "*Antsükang*" masü saka *Jemben* aser *Metionkang* amshir. Antsükangji antsü ka medongyim tasazük saka antsü kowi enoktsü iba yari touchi talang *nükmen* ka nungi dang takyonga atur (yong tepaitep 6 - Hexagonal).
9. Page 25, "*Saru/Yimchi Molok*" Ano iba dang tilaba "*Pua Molok*", "*Yi Molok*", "*Nübo Molok*" aser "*Entsü Molok*" ta tatakzük tekupokba molok tilaba pezü amshir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Germany nung küm 700 tejaklen samaba Tenla ki ka ngutetogo



Wadden Sea nung tzü kanga ajema akümba mapang archaeologist temi akhidang Tenla ki ka aliba tesem nung bushisüngdangba mapang tangokba noksa nung angur.

May 28, 2023: Germany linük nung 1362 küm samaba Tenla ki ka ngutetogo; tesüiba küm 100 tashi scientist temi akhidang aliba jila Rungholt kong liasüar bushia aruogo. Yipru tesashi ka aitba mapang nung iba jilaji tzü agi mobanga liasü. Akhidang samaba Tenla kiji Wadden Sea tzüyimkümanasa angu. Germany nung organisation asem - Kiel University, Johannes Gutenberg University of Mainz,

Centre for Baltic & Scandinavian Archaeology aser State Archaeology Department of Schleswig-Holstein-i senteper iba project inyaka liasü. Tenla kiji metong nung tasazük metre 40 aser lenden nung tasazükji metre 15 shi liasü. "Tang ngutetba Tenla kiji North Frisia kübok aliba Arogo tulutem rongnung densema liasü," ta Kiel University nung ROOTS Cluster of Excellence nungi archaeologist, Dr Bente

Sven Majchczack-i metetdaksü. ZBSA nungi archaeologist, Dr Ruth Blankenfeldt-i, "Tenla ki aliba tesemji nisungtem aliba tesem tiyongtsü ka liasü ta bushitetogo," ta metetdaksü. Akhidang aliba Tenla kiji shishilembaba jila Rungholt nung liasü, aser iba tesem dang "Atlantis of the North Sea" taka ajar. A.D. 1362 nung yipru mopung tesashi den tzümetstung ajanga iba Tenla kiji samaa liasü.

Khristan MP temi Nigeria nung Khristan ka chioktsü akhanger



Yahaya Sharif-Aminu

May 28, 2023: UK nung Khristan yimtenren lenirtemia Nigeria nung Tsüngrem mezüngmeshiba ken o nung aija alir ka chioktsü akhanger. Nigeria nung Khristan, Yahaya Sharif-Aminu-i atenba ken ka voice message ajanga tangar den lemsatep, aser iba kenji ajanga Muslim nung ainkar Muhammad mezüngmeshiogo, ta aija pa nem tasüba temerenshi agütsütsü atema 2020 küm obendang agüja liasü.

Pai Nigeria nung Supreme Court nung temepishiba ken o benoka lir. Pa tangsa chioktsü atema akhangba shidi nungji UK Parliament nung Jim Shannon, Fiona Bruce aser Rachel Maskell nung densema Khristan MP tem aikati sign süa lir. Parnokisa, "Iba House-i Nigeria nung Tsüngrem mezüngmeshiba ozüngtem aitsür, kechiyong item ozüng ajanga nütsüng ajema aliba

yimsü nungi tamangertem mapang talanglang tepuokdak ayur mesüra loktii tepseter," ta metetdaksü. Taoba ita nunga European Parliament-i Yahayu tangsa chioktsüla, ta sangdonga liasü. Tsüngrem mezüngmeshiba ozüngtem nung ajemdaker Africa nung nütsüng teimba aliba Nigeria linük nung Khristantem maneni amokmerener. Yaküm-a Khristan kaketshir ka, Deborah Samuel-i la tatidang nung takok anguba atema Yisu nem tenüngsang agütsüba message ka WhatsApp group ka nung lemsatepba atema telok kati la tepseta liasü. La long agi onsetba video ji prokshi saka la tepsetba ken o dak sendakba nung aibelener shinga mapu. ADF International indang Global Religious Freedom atema Legal Counsel, Lizzie Francis-i, "Yahaya tenüng nung ola adoker UK Parliament nung MP tem dang onoki pelar," ta metetdaksü. "Reshikangshi kecha metsübui sadoksadoka pei tebilemba mejembitet tashibo iba loktilibaji nüchiso mali. Alima linüktemi maneni Yahaya densema ochi temeden mangurtem atema ola adoktsütsüla," ta Francis-isa metetdaksü.

ANOGO ABEN TSÜNGREM DEN

Ejip nung metsü aser tesangwa (T.ken 105:24-45)

Mosa aser Aaron mapang na Ejip nung ali asübo Farao chuba tekong merangba ajanga Ejip limai wara yokba nung na densemer lila. Yihuda nungeri Ejip toktsüdang naia kechi shir lila? Ken züluri ya zülü, "parnok aenshia aodang Ejip pelaa liasü, kechiyong parnok madak tetsübu agi tonga liasü" (t.38). Kodang Tsüngremer nisung alima nungi piladir, kodang asen Kibuba tanaben arudir, alimai pelatsü.

Ejipji alima noksa lir. Tsüngremer (Israel) asoshi, ibai alar lima aser anisüngzük maka mapa inyadkak lir. Ibai tapung lima. Saka Kanan limaji lenten, tenem aliba lima, tsünglu aser süngjang teperi aliba lima, mamatzü aser ninang mochitzü ayimdak lima. Kodang na kümzüka lidir, tanelaren Tsüngremi na Ejip nungi anitetsü. Pai na Kanan nung yutsütsü aser ashitsü, "item temoatsütem ajak agiang." Kechiba Israeli Ejip toktsüdang Ejip pelaa liasü? Tejangja kuli kaji- Ejip nung tsübua liasü. Israeli chichiba Tsüngrem külema liasü, aser parnok Tsüngremi wara ajanga Pa ain sayu. Israel nungerji Ejip asoshi minprongtsü ka liasü- zübu nung metsü ama, tajung jungkai adoktsüba tesangwa ama. Ejip nung kuli asütsü Tsüngremi Israel amshi,saka Ejipi magizük.

Khristantemji metsü aser tesangwa lir. Ken ken asenoki nisungtem maginer: ken asen libaliro ajanga taiji tutettsür. Asenoki item anogotemji ajangtsü. Ibaji tanüa asütsü akok. Yisu Khrista tanü arutsü akok aser Pa pur sentsüwangshi kidangi anir aotsü akok. Joko metsü mali. Tesangwa mali. Saka kechi? Obendangba. Asen Kibuba aru ataba mapang asenok teinyaktsü mapa lir ta asenoki bilemtetdi.

Arogo teinyaktsü mapa kaji alima mitsü aser alima tesangwa ama alitsübaji lir. Ken ken nai ibaji memeteti tangar yirutsür. Ken ken Khrista indang tangar dang ashitsü mapang tajung angur. Arogo ne mapa nung metsü aser tesangwa ama alitsü nai bilemtsü akok asü? Kar asoshi tanü ne taküm balaka alitsü Tsüngrem dang asüngdangang.

Tajikistan nung Khristan ka küm pezü sülen jail nungi chiokkogo

May 28, 2023: Küm pezü tejaklen Tajikistan nung Khristan ka apuba sülen küm pezü jail nung lir tawa tu chiokkogo, ta International Christian Concern (ICC)-i metetdaksü. Arrshi küm 72, Shamil Khakimov-i Yisu Khrista osangtajung lemsatepba atema apu. Pai tamangba yimsü nung ajemdaker tesempa prok aser pa ket nung yimsü dak sendakba kaketter liasü, ta pa aija liasü. Jail nung amongba mapang Khakimov nem medical treatment magütsüba agi pa tetsüng aser temepu nung azü junga mejajai kangtena aküm. 2007 küm Tajikistan sorkari linük nung Jehovah's Witnesses nokdanga liasü. Iba telok yagi tangartem Khristan yimsü dangi meyipdaksür ta tai tonglokja iba telok nokdang. Iba mapang nungjagi tenzüka parnok aika puogo. Ajisüaka 2020 küm Tajikistan Tir, Emomali

Rahmon-i ozüng tasen ka nung sign süa tamangba yimsü nung ajemdaker tesempa prokba ken o nung aibelenertem jail kümsük kanga ajemja liasü. Iba ken o nung aibelenertem küm 5 tashi tepuokdak yua liasü saka iba ozüng tasenba kübok anogo 10 tashi dang tepuokdak ayutsü mesüra senchi dang achitsü. Küm pezü tejaklen Khakimov aitsüba mapang nung pa küm 7 ser ita 5 tepuokdak ayutsü obendang agüja liasü. Khakimov chiokba osang prokba sülen United States Commission on International Religious Freedom (USCIRF)-i sangdong ka ajanga, "Tajikistan sorkari, kanga tain kati pai amangba yimsü tangar den lemsatepba atema pa taküm aser pa temeden küm pezü auyaogo. Tajikistan sorkari religious freedom alema inyakbaji alimai meteta kümdar," ta metetdakja liasü.

AO OSHI ANGAZÜKDAK:
TANÜ ANGAZÜKTSÜBA OJANG



Raktok

(v) atsüdoka endok (pull out and throw)

* Onoki alu nung ai ajak **raktoka** inyak.

Rakzük

(v) Tashiyim agi bener ao (rob)

* Auertemi lenmang nung putir indang sen **rakzük**.

OLONG PAITEP # 6529

Grid for OLONG PAITEP # 6529 with numbers 1-24 in a 5x5 layout.

TIPIEN

- 1. Saku - (4)
6. Songjen - (7)
7. Mali/Tazüung - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüung kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O lamendaktak - (4)
4. Nütsü tebuba - (3)
5. Anüungdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. ___ tatsü - (3)
12. Tebur kidong aser zünga kasa tsüngda jatepba - (4)
14. Pela agizükba tapu ka - (5)
15. Tenüung atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6528 TELANGZÜBA

TIPIEN :

- 2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu,
15. Raksa, 16. Arameso,

LANGTSÜNGLEN :

- 1. Alimang, 2. Pongen,
3. Samaru, 4. Nün, 6. Pio,
9. Nüngdak, 10. Yongya,
11. Kongro, 13. Ora, 14. Ata.



ALOKBA IAS INTERVIEW NUNG:

UPSC member : Na kanga junga langzüdagi, tang tatemsaba question ji, temela pungu asüngdangtsü asü kanga tasak ka dang asüngdangtsü, nai pilemdanger lemtetang.

Alokba : Sir, ni pilemdangogo, oda kanga tasak kaji dang asüngdangangma.

UPSC member : Ok, aonung tama arur asü anepdang tama arur.

(Talangka pilemdanger langzür)

Alokba : Sir, anepdang tama arur ati!

UPSC member : Rasaa shiangjong.

Alokba : Sir, question tasak ka dang asüngdangtsü nangzüktep maha?

UPSC member : Ok ok, you are selected!

- Lilir : WhatsApp

Form titled 'Tepela Tasoba Anogo' with fields for name, school, class, and address.

PM Modi-i Assam indang mezüngbuba Vande Bharat Express tenzüksütsü

Guwahati, May 28, 2023 (Agencies): Prime Minister Narendra Modi-i May 29 anüngdang video conferencing ajanga Assam nung mezüngbuba Vande Bharat Express tenzüksütsü.

Iba train tajung ajanga northeast nungger senzüsönong nung temelenshi bentsür arutsü aser tourism ajungkettsü imlar.

Vande Bharat Express ya Guwahati aser New Jalpaiguri tsüngda senzüsü aser ghonda 1 agi tajemba agitsü.

Vande Bharat Express ajanga ghonda 5 ser minute 30 nung Guwahati nungi New Jalpaiguri atongtsü. Tang tashi nung train tekaratiba agi ghonda 6 ser minute 30 agir.

Prime Minister Modi-isa electrified sections indang 182 route kilometers lapoktsütsü.

Electrification asüba ajanga train tem tekaraba nung senzüsü aser iba ajanga mapang ajemtsü. Talisa iba ajanga Meghalaya tashi train senzüsü lenmang lapoktsütsü.

Prime Minister Modi-isa Assam kübok Lumding nung DEMU/MEMU shed lapoktsütsü.

Assam CID-i District Transport Officer ka apu

Guwahati, May 28, 2023 (Agencies): Assam Police indang Criminal Investigation Department (CID) ajanga District Transport Officer (DTO) puogo.

Charaideo DTO Rajib Chandra Bordoloi-i ashikülaka gari licenses agütsüba atema CID kettangsurtemi pa apu.

Yaküm Nagaland aser Arunachal Pradesh indang taila licenses agütsüba atema pa mapa nungi anentsüogo.

Assam Transport Department-i ashiba sülen CID-i Indian Penal Code (IPC) kübok FIR ka benoka liasü.

CID kettangsurtemi DTO Office Charaideo semdang aser idak nung jagi taitüsü aketba kulikakettem angu. Parnokisa Transport Commissioner, Assam, Guwahati office nungia kulitem bendenogo.

Kuli balala nung ajemdaker taoba I/C District Transport officer Charaideo aser tang teinyakdak Enforcement Inspector Rajib Ch Bordoloi-i taila gari license agütsüba putet.

CID kettangsurtemi Bordoloi apu aser pa anogo pungunü police ket nung ayutsü temelaba agütsüogo.

Mizoram nung ZORO nungeri Manipur lisopurtem pusema lungkak ait

Aizawl, May 28, 2023 (Agencies): Mizoram yimtiba Aizawl nung Honibarnü nisung noklang aika adenshir Manipur nung lisopurtem nungitba sayuogo.

Iba sentong ya Zo Re-Unification Organisation (ZORO) ajanga ayongzük aser parnoki Zo nungeri Chin-Kuki-Mizo-Zomi kettangsubaren ka kübok

OFFICE OF THE DIMAPUR AOLI OZÜKÜM TELONGJEM TENÜNGSANG TETUSHI AGÜTSÜR



Wb. YIMKUM OZÜKÜM



Kr. AOTULA OZÜKÜM

Ozüküm kidong Wb. Imtilepzuk Ozüküm (Sungratsü) aser Kinungtsü Mrs. Meraienla Aier (Mopungchuket) tena jabaso Wb. YIMKUM OZÜKÜM aser Wb. T. Watimeren OZÜKÜM (Longpa) aser Kinungtsü Mrs. Kining tena jala Kr. AOTULA OZÜKÜM tenati tawa UPSC Civil Service tatidang nung takok tulu anguba asoshi asen Dimapur Aoli Ozüküm Telongjem-i Kangasa pelar aser tena nem Tenungsang tetushi tulu agütsür.

Nubur aser alima tenzüksü asoshi Tsüngremi tena shimtetba atema asen Tsüngrem tenung tali asanger. Maneni nena taküm arishi tali moajangma.

Ano, Takum 2023 Küm HSLC aser HSSLC nung Ozükümer aser Ozükümstür shirnokisa takok tulu angu, nenok ajak dang Tenungsang tetushi agütsür. Tsüngremi nenok meranga azungba nung tali temoatsü aser takokba nung jenjang tuluba nung züngtetsü moajangma.

Ano, asen kidong shirnoksa pei academic palala nung temaba jenjangnung ngua lir nenok ajak dang tepela tetushi agütsür.

Tsüngremi nenok ajak moajangma.

Sd/- IMNAWATI OZÜKÜM, General Secretary, Dimapur Aoli Ozüküm Telongjem.

Sd/- K. IMTIWATI OZÜKÜM, President, Dimapur Aoli Ozüküm Telongjem.

OFFICE OF THE TENING AREA AO SENSO TELONGJEM P.O. TENING, DIST PEREN : NAGALAND

Tenüngsang Agütsür



Wb. Imtilepzuk Ozüküm & Wt. Merainla Aier na jabaso Er. YIMKUM I OZÜKUM EAC Nsong-i UPSC Civil Services Examination, 2022 nung takok anguba aser All India Rank 203 ngutetba atema Tening Area Ao Senso Telongjem kanga pelar aser tenüngsang tulu agütsür. Nai iba takok anguba ya Naga nungeri ajak asoshi aser talisa Tening Area nung aliba Aortem asoshi konang lir.

Pa ya kanga dang meranga inyakba, tenendak, bendanga agütsüba aser ochishia aliba nisung ka lir. Tening Area nung Ao Union-i tanü tashi pa den külemi sendaktepa liyonga aruba ya onok kangasa tia taka ta züngshir. Iba ya pa dak temsüa aliba takok lir aser ozü lennir tarutsü wadang asoshi temoatsü meshitsür.

(IMTIKABA) President

(TEMJENCHUJANG) Secretary

Ao Union, Tening Area

Ungma Watsü Telen-i Tir Yimyim May 28, 2023 adok tapak 6 nung "Tenüngsang Agütsür" ta sangdong adokba nung asür Ngangshimar Jamir aser Wt. Tsüktizenla Longkümstür ta melenshia azüngtsü metongshitsür. Aibelenba atema sasar.

Sd/- UWT Mendenpurtem.

Russian drone agi Ukraine yimtiba nung amak

Kyiv, Monupii/May 28 (Agencies): Russia-i drone amshia Ukraine yimtiba Kyiv amak.

Kyiv indang mayor Vitaliy Klitschko-i ashiba agi, petrol station ka anasa drone teraksa ka tsükdang tebur ka asü aser tetsür ka yiru.

Ajak senteper Russia-i kamikaze drones 54 amshia Ukrainian targets nung amaktsü yok aser item rongnung 52 khazüka yok, ta Ukraine indang Air Force ajanga ashi.

Russia-i 2022 küm February ita tatemlen nungi tashi ajak amshia Ukraine amak tenzük aser tang Kyiv indang defence tem raksatsütsü meranga amak tenzükogo.

Drone teraksa tsükba ajanga district balala ana nung ki tulu ana nung mi adoka liasü.

Southern Holiyivsky district nung aliba warehouse tem nunga mi senloksü, ta Kyiv ketdangsur temi ashi.

Yasung linük yimtiba anünglen drones 40 dak tema khazüka yok, ta Ukraine ketdangsur temi ashi.

Ukraine Tir Volodymyr Zelensky-i air defence aser rescue services nem tenüngsang agüja "Nenoki tsükchir indang missiles, aircraft, helicopters aser drones raksatsütsü repranger. Nenoki tsükchir indang drones aser missiles khazüka yok shia nisung takum kumzük... nenok ya 'hero' tem lir!" ta ashi.

Küm 1500 jakdang Kyiv yimti amenokba Kyiv Day amungtsü atema nüburttem renemtepa mapang Russia-i asaa tenük yoker amaker, ta ketdangsur temi ashir.

Northwest tsütsü Volyn nungi tenzük southeast tsütsü Dnipropetrovsk tashinung region 12 nung Deobarnep air raid alerts agüja liasü. Kyiv antiölen Zhytomyr yimti nunga apokba olatem angashiba osang lir.

Tang ya Russia-i kamikaze drones den ano cruise aser ballistic missiles tabu balala amshia amaker.

Russia-i Kyiv aser dangalen amakba yimya tesashiba kumogo aser Ukraine-ia meyiper amaktsü renemshiba mapang lir.

Operation tenzüksü linük renema lir, ta Honibarnü Ukraine indang sepai tanishir kati osangbener dang ashia liasü.

Tashi tulu aliba National Security and Defence Council of Ukraine indang secretary Oleksiy Danilov-i ashiba agi, Tir Vladimir Putin'er sepaitemi rakzüka aliba litsü tanaben agitsü asoshi asung, anü mesüra hopta ka tsüngta tenzüksü akok.

Ukraine-i meyiper amaktsü ita aika sentong yanglua arur. Saka sepaitem teraining balala agitsü aser Western linüktem nungi mitkar oset yokba ataa mapang peria agir.

Kasa mapang Russian sepaitem Ukraine south-east tsütsü parnoki rakzüka aliba region tem nung defence akangshir.

Linük anaprongi drone amshia amakba tali akumer. Russia-i Ukraine asoshi tongtipang ki o jen kisung masü saka mitkartem daka tenük yoker amaker.

Russia-i Ukraine indang air defence missiles tem kisung

masü saka item missiles khaloktsüba system tem densema raksatsütsü meranger amai ajiteter.

Ukraine-ia meyiper linük tesem balala nung Russian sepaitemi amokbanger alidak tenük yoker amaker. Item tesemtemji command and control sites, totzü yua aliba tesemtem densema logistical supply lines tem lir. Ukraine-i meyiper amaktsü kanga imla lia linük ana tsüngta raraba tesashiba kumogo.

Tawa Belgorod region nung artillery aser mortar tesashi amshia amakba asoshi Russia-i Kyiv tenüng asüner. Belgorod indang governor-i Ukraine den arütsülen aliba school tem aser Belgorod yimti nung aliba school ajak meyi sodi agütsür shibangtsü Deobarnü totuyuba agüja liasü.

Russia indang ambassador to UK, Andrei Kelin-i osangbener dang ashiba agi, par linük 'resources' aika lir aser ano tang tashi temolung magütsür.

Ukraine nem nok-nü agütsüba ajanga rara ya kodanga mongudangba jenjangi atutsü ta tekumtangtsü ashi aser "Asenoki menüngdakba aser maginüba jenjang tasen kati iba rara mapang talangka melie aitsü," ta pai ashi.

KANGASA PELARA !



ASO - 24/12/1937 | ASÜ - 24/05/23

Onoki teti miema aliba tsürapur **I. Shashi Longchar**, Aonokpu shirangba anogo nungi tenzük tasünü tashi kija, kibong, arago aser lokti shirnokisa ozü dang aria bilema sarasadem rongsen aser shisatsü agi yariogo nenok ajak dang kangasa pelar.

Nenoki ozü dang ajungba yari meyipa agütsütsü kecha maka saka Tsüngrem tajungsangi nenok ajak moajangma ta ozü tamang sarasadem.

Temiem Kinungtsü aser Kinungertem.

Office of the

Longkong Students' Union

Mokokchung, Nagaland

KONANG NÜNGSANG AGÜTSÜR



Sd/-
Imlimendang
President

Wb. T. Tsukti Jamir aser Wt. Katemliila Imsong, tena jala **Kr. Zuluienta T Jamir**, lai 2023 HSLC (QMHS) tatidang nung subject topper Ao (97 marks) nung ngutetba asoshi Longkong Students' Union Mokokchung-i konang nüngsang tulu agütsür.

Maneni HSLC aser HSSLC tatidangtem nung Longkong kaketshir shirnokisa takok nguogo, nenok ajak nem tenüngsang agütsür. Tarutsü anogotem nung Tsüngremi nenok wadang nung azükarua moajangma.

Sd/-
Arensangla
Secretary

Office of the

WAMEKEN VILLAGE COUNCIL

Tenüngsang Agütsür



Wameken shisashir rongnungi taküm 2023 HSLC tatitang nung **Miss. IMNASENLA M. LONGKUMER** D/o. Er. & Mrs. N. Moa Longkumer ajanga tajungtiba takoker menden 18 buba nung takok ngutet nung, la nem tenüngsang agütsür.

Tsüngremi tarutsü anogotem nung la tali moajangma.

Sd/-
Nungsang Longkumer,
TATAR,
Council Chairman.

Office of the

MOLUNGKIMONG VILLAGE COUNCIL

Mejensanger Putu Menden

Dist. Mokokchung, Nagaland. P.O Tuli 798618

TENÜNGSANG AGÜTSÜR



Imtitoshi aser Watimongla na jala **CHUBASANGLA LONGCHAR**-i St. Joseph University nungi M.Sc. (Physics) nung tematiba jenjang ajangteta CGPA 9.28 nung Gold Medal nguteta konang tetushi bener aruba asoshi Molungkimong Mejensanger Putu Menden ajanga tenüngsang agütsür.

Tarutsü anogotem nunga Tulusang Tsüngremi nü len aniang ta sarasademtsür.

Sd/-
(Y. IMSU TZUDIR)
Chairman

Molungkimong Village Council

Sd/-
(ICHUBA TZUDIR)
Secretary

Molungkimong Village Council

OFFICE OF THE

WAMEKEN SENSO TELONGJEM TZUDIKONG TOWN

P.O. Tzudikong, Dist.- Mokokchung
Nagaland - 798623

TENÜNGSANG AGÜTSÜR

Miss IMNASENLA M LONGKUMER, D/o. Mr. & Mrs. Er. N. Moa Longkumer (Wameken) HSLC 2023 Examination nung Top 18th Rank jenjang aser English subject nung topper nung takok tulu ngua konang nüngsang bener arutsünung Wameken Senso Telongjem Tzudikong Town ajanga tenüngsang tulu agütsür. La taküm aser wadang nung Tsüngremi maneni len ania moajangma ta ozü Senso-sanger sarasadem.

Sd/-
Bendangwati
President, WSTTT

Sd/-
Imtiwapang
Secretary, WSTTT

SANGDONGER

Ni, July 01, 2020 anogo Tir Yimyim adok nung kü chirtem anema adoktsüba osang tanü May 29, 2023 nung meyipa agir aser techirtem dang taidok meshir.

Sd/-

A. S. NUNGSANGAO.

HEALTH NURSING SCHOOL

Singrijan, Dimapur

Recognized By Indian Nursing Council,

Affiliated to Nagaland Nursing Council, Approved by Govt. of Nagaland



ADMISSION OPEN FOR :

1. GENERAL NURSING & MIDWIFERY (GNM)
2. AUXILIARY NURSES & MIDWIVES (ANM)

Application forms office mapang arua agizüktettsü.

"Ano tejangjaba nung metettsü asoshi yangi repringang - website: www.healthnursingschool.com or email : healthnursingschooldm@gmail.com

Contact No. +919366938995, +7005151277, +919774043387

Longkak aita aliba wrestler tem police-i apu



Monupii/May 23, 2023 (Agencies): Deobarnü Parliament building tasenba leni longkak aita aotsü asoshi security-i tenokdangba agütsü aliba adena aotsü merangba sülen Delhi police-i Vinesh Phogat, Sakshi Malik aser Bajrang Punia nunger puogo.

Parnok apuba sülen bus nung aniek aser mejangjaba tesem balalai anir ao. Police temisa wrestler tem longkak aita aliba tesem azüngtettsüogo.

Osang ajanga ashiba agi, police temi iba tesem nung longkak aittsü atema wrestler tem nem tangsa tangbo temelaba magütsütsü akok, ajisüaka tang tashi nung official osangbo sangdonga mali.

Police temi wrestler tem dang Parliament leni maotsü atema tekümdaktsü metetdaktsü ajisüaka parnok tashi mangai ao aser iba ajanga mangatetep adoka liasü.

Sexual harassment ken o dak sendakba nung Wrestling

Federation of India (WFI) tir Brij Bhushan Sharan Singh aputsü khanga wrestler temi April 23 nü nungi longkak ait tenzükshi.

Deobarnü Jantar Mantar nung Vinesh Phogat, la adianu Sangeeta Phogat aser Sakshi nungeri tenokdangba agütsür aliba nongpoka aotsü merangba mapang wrestler tem aser police tem nongtepa atsütepba nguogo.

Iba sülen police-i parnok atsür oa bus tem nung tanga wrestler aser parnok pusemertem den külemi anir oa liasü.

"Temzüng ozüng alema inyaksangshiba atema parnok sota yuogo. Onoki temzüng ozüng dak ajemdaker jenjang agütsü," ta Special CP, Law and Order, Dendra Pathak-i ashi.

"Onoki iba tensa asadangtsü nüngdaker. Parnok dang mepeshiaka parnok tashi manga aser tenokdangba agütsür aliba tem raksaba nenoki nguogo. Ibayongji onoki

parnok iba tesem nungi aninogo.

"Kechisüdir süaka yimjung aser tesunep benoktsü. Kecha aibelen masütsü atema onoki jenjang tapet agütsü," ta paisa ashi.

Deobarnü Pathak-i, Parliament building tasenba semzükbä mapang linük anema kecha inyaksangshiba masütsü atema wrestler tem dang mepeshia liasü.

Deobarnü Parliament Building tasenba mesemzükbä tsüngda Wrestler temi 'Mahila Samman Mahapanchayat' sentong ayongzükbä sülen Delhi Police-i Jantar Mantar nung security akangshija liasü.

Kasa mapang nung Vinesh-i bus ka nungi, "aija alisang sadem sadema senzüdar, pa nem sorkari tekümdaktsü agütsür aser onok asayatem shirnoki linük atema medal bener arutsüogo, onokbo linük jalatem atema ochi obendang akhangba atema tepuokdaki yoker," ta ashi.

Luton Town Premier League atema qualify süogo



Monupii/May 28, 2023 (Agencies): Honibarnü Wembley Stadium nung Championship playoff final nung Coventry City den penalty asaya-a asaya goal 6-5 agi akokba sülen Luton Town pur küm 31 sülen tang mezüngbuba Premier League nung asayatsü atema qualify süogo.

Asaya nung telok anapronglai goal kaka agütsür tembangba sülen penalty metsüteptsüsa aküm, ajisüaka penalty metsütepba mapang Coventry Fankaty Dabo-i crossbar nung ball metsüoktsüba sülen Luton Town-i iba asaya koka liasü.

Asaya nung mezüngbuba goal ya Jordan Clark-i Luton atema idaktsü ajisüaka asaya

tanabuba shilem nung Coventry midfielder Gustavo Hamer-i goal ka idakja goal kasasa aküm. Asaya tatemlen Luton nungi asayar Joe Taylor-i goal ka idaktsü ajisüaka pai handball menaba ajanga iba goal magi aküm.

Maneni asaya nung Luton captain Tom Lockyer ground telung nung longdakba sülen anir tuguatok. Centre back asayar ya pa anasa asayar shinga maliba mapang ka nung longdakatok aser medical staff temi ground telung nung pa temang anepalua liasü.

Arishi küm 28 tain Lockyer temang tajungba lir aser pa par kinungertem den o jembitetdar, ta Luton-i osang agütsüogo.

"Asaya akokba atema kanga

pelar, ajisüaka ni tang Tom Lockyer atema dang bilemer. Health ya ajak dang tongtibangba, football dang nungia tongtibangba," ta Luton manager Rob Edwards-i ashi.

Burnley aser Sheffield United na den külemi Luton pur taruba Premier League nung asayatsü. Parnok indang Kenilworth Road stadium nung 1992 küm sülen tang mezüngbuba temaba jenjang nung asayaba football asayatem asayatsü. 1992 küm ya parnok Football League First Division nungi relegate süa liasü.

Luton pur ya rongsenketzüng nung timtem tulu ajangshiba sülen küm teku tejakdang fifth-tier Conference nung asaya liasü. Parnok ya top tier nungi non-league kati lur meyipa atuba mezüngbuba team lir.

"Ni football asaya ajak tembanga asayaogo. Ni taküm summer nung asaya nungi anentsü," ta Pelly Ruddock Mpanzu-i ashi, shiba Luton nungi jenjang ajak nung asayaogo.

WTC Final: Gaikwad melena Jaiswal shimogo

Mumbai, Monupii/May 28 (Agencies): Australia den London kübok Oval nung asayatsü aliba World Test Championship (WTC) final atema Mumbai opener Yashasvi Jaiswal team nung züngoksemogo.

Pai stand-by opener ama Ruturaj Gaikwad melentsü, shiba UK-i motettsü, kechiyong pa June 2-3 nü kibong akümtsü asoshi sentong tulu yanglur lir.

India aser Australia na tsüngda World Test Championship (WTC) final ya June 7 nungi 12 tashi asayatsü.

Deobar anepdang Jaiswal ya Bombay Gymkhana nung Zubin Barucha (director of High Performance at the Rajasthan Royals) den ball temerem agi practice süogo.

Pa ket nung UK visa lir asünung arishi küm 21 tain asayar ya Deobar aonungsa London-i aotsü ta sangdong ajanga metetdakja liasü.

Jaiswal tang kanga junga asayaba mapang ka lir aser taküm IPL nung pai Rajasthan Royals nungi kanga junga asayaogo. Pai taküm IPL nung asaya 14 nung run 625 yanglur, kong century ka aser half century pongu densema lir.

Kasa mapang nung Ranji Trophy nunga pai asaya pongu nung run 404 yanglur, kong century ka aser half century ka densema liasü.

IPL nung kanga junga asayaba ngua taoba mapang asayatem aser mongintemi pa India team nung takaratiba nung züngoksemtsü akok ta jembia aruogo.

HS Prannoy-i Malaysia Masters kokogo



Monupii/May 28, 2023 (Agencies): India nunger ronnungi nüngtugu badminton asayar HS Prannoy-i Malaysian Master 2023 final nung China nunger asayar Hong Yang Weng koka gold medal nguogo.

India nunger asayar yagi iba asaya 21-19, 13-21, 21-18 agi koka Kuala Lumpur nung tebur kija final asaya nung takok tulu ngutetogo.

Arishi küm 30 tain asayar yagi tang mezüngbuba Malaysia Masters nung final tonga asaya aser final atongba dang masü pai takoka ngutetogo.

2022 Swiss Open nung taoba küm final asaya nung Jonatan Christie makokba sülen Prannoy tang mezüngbuba asayamung ka final tongteta liasü.

World No.9 asayar Prannoy, semifinal nung Indonesi nunger asayar Christian Adinata den asaya ajisüaka mezüngbuba game tatemlen Adinata temekok yiruba ajanga masayatetsüsa aküm aser Prannoy nem takok agüja liasü.

Arishi küm 30 tain Prannoy, shibai Malaysia nung iba asayamung nung tetenzük nungi kanga junga asaya liasü, pai world No.6, Chou Tien Chen, reigning All-England champion Li Shi Feng aser Madrid Masters 2023 koker alisang Kenta Nishimoto nunger koker semifinal tonga liasü.

Semifinal asaya nung India nunger asayar yagi tetenzük nungi iba asaya akoktsü temulungtetba aliba sayua asaya aser mezüngbuba point tenet pai ngua liasü. Ajisüaka world No.57 Adinata-i meyiper kanga junga asaya point 15-15 aküm.

Iba asaya nung Prannoy 19-17 agi tejakdang aliba mapang tia maka Christian Adinata yiru aser masayatetsüsa aküm aser iba ajanga India nunger asayar nem takok agüja liasü.

Honibarnü tanga semifinal asaya ka nung the People's Republic of China nunger asayar Weng Hong Yang-i 21-13, 21-19 agi Chinese Taipei nunger asayar Lin Chun-Yi koka liasü.

BILEMDANGANG

"Asenoki tang kechi inyaker iba dak tarutsü sendaka lir."